

Sa Brigata Sassaresa

di Peppino Marotto

Periodo: La contestazione e i movimenti di liberazione (1967-1979)

Lingua: sardo

Tags: comunisti/socialisti, antimilitaristi, lavoro/capitale

Indirizzo: <https://www.ildeposito.org/canti/sa-brigata-sassaresa>

Cussos de sa brigata sassaresa
c'hana vattu sa ghera europea
còntana ancora s'intrepida impresa;

Comente vin trattàdoso in trincea,
sena iscarpas, bestirese, aliméntoso
affrantos de sa bellicosa idae;
furibùndoso in sos cumbattiméntoso,
sena connoscher bene sa resòne
d'inumanos massacros, tradiméntoso;
e Lenìn, cun sa Rivoluzione,
c'haìad fattu sa ghera vinire
in d'una gherradore Nazione.

Si domandaini: a chie obedire?
comente si devian cumportare?
cale vin sos nemigos de bocchire?
It'est su chi podian balanzare
sos pòveros pastores de Sardigna
da cussu orrendu iscuntru militare?

Lis han finas promissu sa cunsigna
de sas terra c'haiana tancadu
chent'annos prima sa zente maligna;
ma cand'ohana sa ghera terminadu
cun s'isconfitta 'e sos Astros-Ungàroso,
nen tribagliu nen terra lis gan dadu;
sos rìccos fin prus rìccos prus avàroso,
ca bendiana s'anzeno sudore
-male pagadu- a prezios càroso;

naràini a su sordadu pastore
chi sa curpa 'e sa sua povertade
vi s'isciopero 'e su tribagliadore;
e lon hana mandàdoso in cittade
pro vagher ghera a sos iscioperantes

chi pediana paghe e libertade.

Ma Gramsci narada a soso militantes
de sa classe operaia: sos sordados
sardos s'annan cun sos tribagliantes;
cand'ischin chie sus sos isfruttàdoso
e chie sune sos isfruttadòrese,
si pentin cussos chi los han mandàdoso.

Infattis, chene gloria e onores,
dae Torinu los han trasferidos,
ca no hanu obbedidu a sos signores.
Sos operaios tantu agguerridos
su noighentosvinti hana occupadu
sas fàbricas, cumpattòso e unidos;

Torinu viada su puntu avanzadu
in sa lotta de s'occupazione,
ca vi da Gramsci bene organizzadu;
ma pro sa vera liberazione
dae s'insfruttamentu padronale
bi gheriad sa rivoluzione;
e no han decretadu in generale
s'isciopero, sos capos riformistas,
pr'imponner sa giustizia sociale.

Dae Torinu sos Ordinovistas
naraina: Custu est su monumentu
de abolire sos capitalistas,
sinono ha a leare supravventu
su capitale cun sa prepotenzia,
seminende terrore e ispaventu;

unu sistema de delinquenzia
pro tantu tempu hada a cancellare
de su socialismu s'esistenza.
E Gramsci non podiada isbagliare.

Informazioni

Poesia di Peppino Marotto di Orgosolo (NU) scritta in onore dei Sassarini della Grande Guerra